

南疆緙史

一函
十冊

南疆緙史
卷一

釋史摭遺卷十七目錄

吳郡李 瑤子玉纂

逆臣列傳

左良玉

金聲桓

王得仁

左寧南跋扈早著甲申後則衰病侵尋矣稱兵

內嚮實爲黃澍慫恿以成遂不能逃一逆字赧

王云看佗本上原不曾反論者目爲疑案直是

千秋遺恨耳至金聲桓則翻覆無成惟以嗜殺

立威生民塗炭溫氏謂其始終一賊列於逆臣

良不誣也甬上全氏言金王斷非成事之人然
使當時贛州無梗則李成棟之兵下庾關直抵
江上外援未絕雖終非官軍敵而圍城亦未易
遽下且尙有退步也乃天特假高進庫以厄之
以是知大命之有歸也夫

釋史撫遺卷十七

列傳十七

左良玉字崑山遼東人以軍校歷職至都司崇禎元年寧遠兵變巡撫死坐削職窘甚已走昌平投總督侯恂麾下大凌河圍急恂與總兵尤世威議所遣世威言非良玉不可良玉顧爲走卒當夜世威遣諭意詰旦恂大集軍士乃拜爲副將酌酒三令箭一並以金三千送之行曰三卮酒以三軍屬也令箭如吾所親行者爾諸將勉聽左將軍令卽拜疏入朝良玉遂

連戰松山杏山下錄功弟一身經百戰績最多歲餘
擢至總兵官以故感恂恩次骨獻賊躡江北良玉遣
來堵勦至輒報捷漸自恣十年應天巡撫張國維入
山搜賊三檄調赴不應總理熊文燦至安慶令以其
軍聽節制良玉心輕之不爲用明年賊假官軍旗號
襲南陽屯南關良玉適至疑而急召之獻賊逸追及
發兩矢中賊肩復揮刀以擊流血被面乃爲其黨救
之去逃入穀城未幾請降良玉知爲僞請擊之文燦
不許十三年楊嗣昌出督師奏其有大將才拜平賊

將軍尋加太子少保。浸驕。日甚。遂不受約束。獻賊自馬瑙山之敗。妻妾俱被禽。竄入興歸界。良玉乘勝力追降其黨。過天星爲部將。賊旣窮。遣使操重寶。啗之曰。公所部殺掠多。而閣部猜且專。獻忠滅公。亦不久矣。良玉心動。縱之去。監軍萬元吉審其蹊。扈勸嗣昌制之不聽。已而賊入蜀之巴州。召合兵。逞擊九檄。不至。賊竟席捲出川。陷襄陽。襄王被執。嗣昌不食死詔。落職戴罪。自贖。卽從南陽進兵。大破之。降其衆數萬。獻賊中股負重傷宵遁。而闖賊適至。困良玉於偃城。

幾陷得陝西總督汪喬年兵救之帝時肅清軍政專
倚良玉辦賊十五年三月闖賊圍開封急時侯恂繫
於獄命釋之起爲督師發帑金十五萬犒良玉營激
勸之會師朱仙鎮官軍營北賊營西賊勢猖獗良玉
一夕拔營走羣帥望見皆潰賊於要道先掘塹而從
後大呼掩擊良玉兵大亂下馬渡溝僵仆溪塹中趾
其顛而過賊更蹂之遂大敗棄馬騾萬匹器械輜重
無算走襄陽遷延不進尋開封以河決亾帝怒罷恂
官而罪不能及良玉也良玉壁樊城大造戰艦驅襄

陽一郡人以實軍有衆二十萬時已多病不能與鬪
賊角賊復以衆十萬至爭渡勢不可遏迺引舟夜遁
抵武昌從楚王乞二十萬人餉曰我爲王保境王不
應乃縱兵大掠火光照江中宗室士民奔山谷中半
爲土寇所戕驛道傳王楊基奪門出良玉兵刼其貲
并及其子女自十二月二十四日抵武昌至十六年
正月中始去居人慶更生蘄州守將王允成順流爲
亂破建德掠池陽下蕪湖泊舟三山荻港間聲將載
兵漕艘鹽船盡被刼奪南京文武陳師江上爲防禦

商旅不行士民一夕數徙都御史李邦華奉召出湖
口亟草疏以聞良玉招允成以危詞懾之稍欽令安
慶巡撫發九江庫銀十五萬補已營六月糧邦華陞
見帝論良玉潰兵狀乃請歸罪允成詔誅之而獎良
玉能定變良玉畱允成於軍中竟不誅軍留安慶十
數旬始溯九江上獻賊破湖廣沉楚王于江坐眛不
救秋八月入武昌自立軍府總督侯恂已解任兵部
侍郎呂大器來代恂中道逮下獄良玉知以己故心
鞅鞅遂與大器齟齬江右諸路告急率不爲援甲申

正月封寧南伯其子夢庚挂平賊將軍印功成世守
武昌命給事中左懋第便道督戰良玉條具進兵月
日以聞未報京師陷福王立晉爵爲侯蔭一子錦衣
衛正千戶與黃得功等列諸鎮專以上流事委諸尋
加太子太傅時閭賊敗於關門得趁其隙稍復楚西
境之荊州德安承天而湖廣巡撫何騰蛟及總督袁
繼咸居江西皆與之善南都因倚爲屏蔽良玉長身
頰面驍勇能開左右弓箭不虛射目不知書而多機
智親軍愛將得衆心歡以是戰輒著功兵數十萬號

百萬前五營爲親軍後五營爲降軍每春秋肄兵武
昌諸山一山幟一色山谷爲滿軍令以兩人夾一馬
馳曰過對馬足動地殷如雷聲聞數里諸鎮兵高傑
最彊而遠不及于左比朱仙鎮之敗精銳畧盡後歸
者多烏合自以老且病已無意中原故軍容雖盛法
令不復相懾馬士英當國與阮大鍼慮東林倚爲難
謾辭修好陰忌之以良玉由侯恂起恂故東林也會
監軍御史黃澍入朝挾良玉勢面觸士英奸士英恨
甚使人糾其賊擬旨逮治澍返緹騎至良玉留弗遣

澍乃陰諷將士譁欲下南京索餉以救澍澍復曰以清君側爲請亾何有北來太子事良玉疏救言東宮之來吳三桂實有明驗諸臣逢君不顧大體何至一家骨肉眎若仇讐澍遂藉此激衆以報已怨召三十六營與之盟良玉意始決具疏傳檄聲明士英七大罪討之疏云竊見逆賊馬士英出自苗種性本凶頑臣身在行間無日不聞其辜狀無人不恨其奸邪先帝皇太子至京道路洶傳陛下屢發矜慈士英以真爲假必欲置之於死而爲快臣前兩疏望陛下從容

審處猶冀士英夜氣稍存亦當剔腸悔過以存先帝
一綫不意奸謀日甚一日臣自此不與奸賊共天日
矣臣已提師在途將士裂目指髮人人思食其月臣
恐百萬之衆發而難收震驚宮闕且聲其梟狀正告
陛下仰祈剛斷與天下共棄之下列翻逆案修要典
鬻官爵進私黨兩子梟獍各操重兵司馬昭將復見
今日私蓄歌女希圖選御亂及中官又睚眦報怨生
平不快意人一網打盡九重秘出而言動周知募死
士詭名禁旅以觀陛下動靜輒謂廢立由我凡此梟

不容于死者有七疏計千餘言末云此非臣之言諸將士之言也非獨臣標將士之言天下忠臣義士愚夫愚嫺之公言也伏乞陛下立將賊臣士英等肆諸市朝傳首四方用抒公憤臣等束兵計刻以待不禁大聲疾呼檄切以聞其檄有云本爲報仇而立君迺事事與先帝爲仇初因民願而立王迺事事拂生民之願除誥命贈廕之餘無朝政自私怨舊仇而外無事功又云朝中奸黨盡去則諸賊不討自平儻左右兇惡未除則河北雖平無用檄發良王遂舉兵邀巡

撫何騰蛟偕行騰蛟赴水免自漢口達蘄州二百里
舳艫相接至九江邀總督袁繼咸入舟袖出一牋云
奉皇太子密敕集諸將盟繼咸正詞拒之且約不破
城駐軍待命而督部裨將郝效忠與左兵通私約入
城縱火殘劫良玉病已劇望城中火光大哭曰吾負
臨侯矣臨侯繼咸字是夜嘔血數升死時乙酉四月
初也其子夢庚秘不發喪諸將推爲畱後連陷郡縣
順流東下抵采石朝命黃得功渡江防勦我

大清兵已下泗州逼儀徵夢庚爲得功所敗遂偕黃

澍以衆降

撫遺曰寧南恃功寢驕祇以心輕熊文燦楊嗣昌
一流人耳夙眷深得將士驩無黃澍則必無索饒
事兵不索饒則烏得入其內犯梟是可保修名於
不墜也觀其吾負臨侯一語其初衷可鑑矣百世
而下史氏率書其反反則澍成之也澍惟有觸奸
一事爲時論所許旣降後又以不薙髮賺死金先
生正希受職後又垂涎金穴致沿海生靈於重遭
夷繆吁名教中迺有此人邪君子曰損者三友寧

南之身敗名裂而遺恨千秋者惟澍一人足成諸
甚矣交之不可不慎也

金聲桓字虎臣遼東衛人遼東平家口被俘身獨脫
走入關初投左良玉軍良玉以同里故任之積功至
都督同知充總兵官甲申淮揚巡撫路振飛調將分
道防河聲桓與之團練兩淮間得衆數萬以助大學
士史可法督師出請之從征已駐防揚州隸良玉後
軍乙酉五月我

大清兵下九江左夢庚以所部三十六營降諸將相